

**Bələ nii sagı tə, Polə nə púpúní
 v pa
 Timote
 nə
 Timote bələ nii sagı tə yuu
 wa sɔgɔ**

Lìù tə, v nə púpúní sagı kv tə

Kv yi *tuntunv Polə nə púpúní kv. Máná tə wa, v nə púpúní kv, də v yi v wulə bání diè wa Romə nə. Kv yin càn zənzən kv pa wá. U mu ya bwələ, sə kv zwèe, yá liù də yà təlè, sə v san v nə.

Lìù tə nə, Polə nə púpúní

Sagı kv yi bələ nii sagı tə, v nə púpúní v pa Timote nə, v nə yi v tutundon, v ga swə wá zənzən.

Sagı tə wa sɔgɔ

Polə təntən v kəni Yı lèèè Timote yırı. U dən swìn Timote con, sə v zıgı diàn v tun Yı tutuŋı tə zəni də yawala, də lià nə swə ba kəni càn v nə, kv tutuŋı təntə yırı. U tə swìn v con, sə v cì lià tə nə, ba nə dı tútúná tə nə ba dèń jə, tə nə ba saŋa, sə lià tun Yı tutuŋı tə. U swìn Timote con, sə v ya ndə v mù Polə yà nə yi nətv. U me, sə v twá cígá tə nə, sə v kə v waa Zwezi nə wuuu, sə v soni lià, sə v ja pínú, sə v dən ká swèèé kàrà nəzəŋu tə, ba nə kàrì wá.

Sagɪ tɛ yígúré wa, ɔ biri nɛtɔ ɔ tɛtɛ nɛ dí càn, dɛ nɛtɔ tɛ Yɪ nɛ san wá.

Polə jònì Timote

¹ À mù Polə, yɪ Zwezi-*Kərisə *tɔntɔnɔ. Kɔ nɛtɔ twá dɛ Yɪ fɪra tɛ. Zwezi-Kərisə tɔn nɛ, sɛ à swìn mu tɛ yoo là con. Yɪ kàn nii dɛ, ɔ wá pa kɔ mu tɛntɛ là tɛ nɛ, ba nɛ vwə ba tìàn Zwezi-Kərisə yɪra. ² À púpúní sagɪ kɔ tɛ, à pɪn n mù Timote nɛ. N yɪ à biú tɛ, à nɛ swə zɛnzɛn. Nɛ nyɪna Yɪ dɛ nɛ *Yuu-Tiu Zwezi-Kərisə nɛ wá fwa pubwanɔ n yɪra. Ba mù nɛ wá dəri n yinəgɛ zɛnzɛn, ba ga pa mú bɪcàn sió.

Polə dàn Timote jìàn

(Tɔtɔnan 16.1-3; 2 Timote 2.1-12; Efezə tìàn 1.3-7; 2 Tesalonikə tìàn 2.13-15)

³ À mù Polə kəni Yɪ lèèè, à pɪn n mù Timote nɛ. À lòrì Yɪ dɛ bɪcàn nɛpon, ndɛ à nɪbara-ba tɛ nɛ jɔn Yɪ nɛtɔ. Mánjá mama, à nɛ wulə à lòrì Yɪ, kɔ nɛ yɪ tɪtɪn nɛ à yèé yɪcav, à yàá lòrì Yɪ, à pɪn mú. ⁴ À líí à tìàn dɛ, n nɛ kwi nɛtɔ, à viru tɛ mánjá wa. Yá à dàń yà swə zɛnzɛn, sɛ à pìí à na mú, sɛ à pùé poli. ⁵ À yàá bɔɔa nɛtɔ tɛ, n nɛ ken n waa Zwezi nɛ wuuu. Kɔ tɛntɛn kɔ ya n nu Loyisə nɛ ken ɔ waa ɔ nɛ. Kɔ zàn lá, kɔ pa n nuu Enisə. Yá à dàń yèé dɛ, n dɛ ken n waa ɔ mù Zwezi tɛ nɛ wuuu, n ga tà níé bɛlə tíú.

⁶ Mɛ kɔ mù nɛ pɪn, à ma líí mú yoo kɔ tɛ. Ja Yɪ tarpɪɔn tɛ, ɔ nɛ pɪn mú, sɛ n ma tɔn zəni. Mánjá tɛ wa, à nɛ tún à jìàn tɛ n yuu wa, Yɪ pɪn mú tarpɪɔn tɛntɛ. Kɛ n diàn lá n tɔn dɛ kɔ tarpɪɔn

təntə. ⁷ Yɪ-**Sinju* yáá ba pɪn, liù jì yáá ŋwìán tíú. Kɔ̀ m̀ nɛ pɪn, dàn ká pa, n ya yáá ŋwìán tíú. Kɔ̀ yáá pa nɛba diàn, sɛ nɛ ma tun, nɛ pa Yɪ nɛ. Kɔ̀ yáá pa nɛ sɔ́nì lià, kɔ̀ ga pɪn, nɛ yèé nɛ tiàn janv.

⁸ Dàn ká pa cavɪra ja mú, sɛ n swìn nɛ **Yuu-Tiu* yoo n birɪ lià nɛ. Dàn ká pa cavɪra ja mú, à m̀ Polə nɛ wulə bán diè Zwezi-Kərisə yɪrɪ dɛ. N dɛ mɛ, sɛ n dé càn suywáŋú tɛ yɪrɪ, ndɛ à nɛ, dɛ diàn tɛ, Yɪ nɛ pɪn mú. ⁹ U m̀ Yɪ nɛ jon nɛba nɛ cɔna wa. U kúrí nɛba, sɛ nɛ ya v m̀ lià. Kɔ̀ tà nɛ tutunzəŋə yɪrɪ, kɔ̀ ya v tətə nɛ swə kɔ̀ nɛtv, kɔ̀ twá dɛ v pubwanv tɛ nɛ. Yɪ tətə nɛ sɔ́nì, sɛ v fwa kɔ̀ nɛtv tɛ, dɛ lɔv tɛ wà fwa. Yɪ tətə nɛ twá dɛ Zwezi-Kərisə, v ma tun v pubwanv tɛ nɛ yɪra. ¹⁰ Zwezi-Kərisə jon nɛba nɛ cɔna wa, yá v zwèe tiàn diàn. Kɔ̀ m̀ nɛ pɪn, síún nɛ, Yɪ pubwanv tɛntə dàn yɪ nɛpon. Zwezi twá suywáŋú tɛ nɛ, v birɪ dɛ, lià tɛ wá na mu, kɔ̀ nɛ ba zwèe Yɪ con.

¹¹ Yɪ tún nɛ, sɛ à ya v tuntɔnv, à swìn suywáŋú tɛntə, dɛ à kàrɪ kɔ̀ à birɪ lià nɛ. ¹² Mə kɔ̀ m̀ yɪrɪ nɛ, à dé càn tɛ tɛ, yá cavɪra ba nɛ jə. À m̀ yèé liù tɛ, à nɛ keni à waa v nɛ. Yá à yèé dɛ, suywáŋú tɛntə, Zwezi nɛ pɪn nɛ, v wáá kɔ̀ nɛ v cì, kɔ̀ ja vɛlə diun tɛ, v nɛ wá pìi v bà.

¹³ Twá cígá sùràn tɛ nɛ, n nɛ nì à nii wa dɛ, à swìn, sɛ n dɛ sùràn ya ndɛ tɛ nɛ. Dàn ká lwán won mama tɛ wa. N nɛ swìn tɛ sùràn tɛntə, Zwezi-Kərisə nɛ pɪn, sɛ n kə n waa v nɛ, yá n ga sɔ́nì lià dɛ. Kɔ̀ m̀ yɪrɪ nɛ, ja tɛ sùràn tɛntə n bɪcan wa. ¹⁴ Ywán suywáŋú tɛ yuu, Yɪ nɛ pɪn

mú. Ywàń ku yuu də Yı-*Sinju tē, ku nə wulə də nəba.

¹⁵ N yəə də, Kərisə lià tē mama, ba nə wulə Azi nagwanaa tē wa, vıga nə ba dıgv. Fizwələ də Ǝrəmozwenə twá ba wulə ba wa. ¹⁶ À lōri nə Yuu-Tiu, sə v dəri Oneziforə mù, də v diè lià yinəgə zənzən. U mù yáá zùri à bıcan, v ga ba à cavıra dəri, də ba nə vwə nə də banzala tē. ¹⁷ U nə twi *Romə wa yəbə, v bıbarı v pià bwálı tē, à nə wulə wuu, halı v bà v na nə. ¹⁸ Nə Yuu-Tiu nə wá dəri v yinəgə zənzən, dıun tē nə, v nə wá piı v bà, v bürì ləzoni bürà. N mù yəə tutunan tē, v nə tun v pa nə, máńá tē wa, à nə yın Efzə nə, zəni.

2

*Ka twá Zwezi-Kərisə nə də waa nədv yoo
(1 Korəntə tián 9.24-25; Matıə 10.32-33)*

¹ N mù Timote yı ndə à mù Polə biú nə. Zwezi-Kərisə fwa v pubwanv tē n yıra. Ku mù nə pın, n dání pa n jìàn dòn. ² N nı Yı sıgv tē à nii nə, à nə swın lià zənzən yáá con. Tı ku sıgv təntə, n ma kàri lià tē duən tē, ba nə yı pùé nədv tián. Ku tián təntə də kúv mə, sə ba wàní ba tı ku, ba ma kàri lià duən də.

³ Də n nə tıńa, n pın Zwezi-Kərisə nə, sə n sèe n dé càn, ndə pamanv nəzəńu nə sèe, v dé càn nətv. ⁴ Liù nə vèli pamanı, v nə pià, sə v poli v yuu tíu tē pùé nə, v kúv wà mə, sə v fwa yìèn tē, pamanv nə wà mə, sə v fwa. ⁵ Ku yı ndə liù nə wulə v dəri, v mù də lià duən, sə ba jon ńwírán. U nə wà nətv, ba nə mə, sə ba dəri dəru tē nii nə twá, v wàri dun yupuu v nı ku wa. ⁶ Ku tē yı

ndə liù nə, ʋ nə ken ʋ diàn lá, ʋ ma vari kára. Mə ʋ mù nə wá yà tɛntɛn liù tɛ, ʋ nə dí yáá ʋ na ʋ tori kára tɛ ciʋ, máŋá wa. ⁷ Bún sùràn tɛ tɛ yoo, à nə swìn n con. N nə buŋa tɛ yoo, *Yuu-Tiu wá pa, n ni tɛ mama dɛn.

⁸ Lii Zwezi-Kərisə yoo, ʋ nə tɪga, ʋ pii ʋ bwin ʋ nan tian wa. Ba lɔri wá più *Davidə dwíí tɛ wa. Mə kv mù nə yi suywánú tɛ, à nə swìn, à biri là tɛ nə. ⁹ Kv suywánú tɛntɛ, à nə swìn, tɛ nə pin, à wulə banzala tɛ wa, à dé càn, ndə à fwa yolwan. Yá də kv nɛtʋ tɛ mama, ba tɛ wà Yu sugʋ tɛ ken bán diè. ¹⁰ Kv mù nə pin, à sɛe, sɛ à dé càn, là tɛ yiri Yu nə kúrí, sɛ ʋ twá Zwezi-Kərisə, ʋ ma jon ba ba cuna wa, ba ga zʋ ʋ dun tɛ wa, tɛ nə ba zwèe.

¹¹ Nɛn, sùràn tɛ, tɛ nə ba tútúná jə. Tɛ mù nə yi də, nə nə twá Zwezi-Kərisə nə, nə ti, nə wá twá ʋ nə, nə pii nə bwin nə nan də. ¹² Də nə nə jin pínú wuuu, nə wà pii nə kə nə kwa, nə wá dé pàri də wá. Yá nə dàń nə vɪga wá, ʋ də wá vi nɛba. ¹³ ʋ yi piùé nɛdʋ tíú. Kv mù nə pin də, nə nə swə nə bà nə jì pwíí bɛlə tián də, ʋ mù tɛ yi piùé nɛdʋ tíú, ʋ wàri ʋ tiàn ʋ pii ʋ ten.

Tùtùnù nɛzəŋu yoo

(1 Timote 1.3-7, 18-20; Zwakə 5.19-20)

¹⁴ Lii yoo kv tɛ là tɛ mama, caga ba nii nə Yu yáá con, ba dàn ká fwa jara yìèn yira boŋu yuu wa. Tɛ mù jara tɛntɛ ba won fwa tɛ pin ba, də kv nə tà, sɛ tɛ cùgù là tɛ, ba nə cuga tɛ. ¹⁵ N mù Timote, kə n diàn lá, sɛ n ya liù tɛ, n nə twá Yu puswənə nə. N mɛ, sɛ n ya tùtùnù tɛ, n nə

tɔŋa zəni, n tɔtɔŋi tə cavıra dān ká ja mú. Ku mɛ, sə n swìn Yu sɔɡu tə, ku nə yi cígá tə, n bɪri là nə zəni zəni. ¹⁶ Dān ká kə n nii ləyərən yomanan tə wa, tə nə tà Yu nyiən. Là tə, ba nə jə yomanan təntə, yàá pií manɔn manɔn, ba zu tɔtɔnkɔkwɪnan tə, Yu nə ba pià. ¹⁷ Ba mù là təntə kàrà yi ndə naworu nə, ku nə wórí ku zwɪ wuu. Mə Yimene də Filetə wulə ba mù là təntə wa. ¹⁸ Ba mù kúb ba cígá tə nə twá. Ba mù swìn də, Yu manwarɪ ɔ pií ɔ bwin là ɔ lɪ tɪan wa. Ba twá ku nətɔ tə nə, ba ma ɡɪɡarɪ là tə, ba nə keni ba waa Zwezi nə wuu ba dɔɡa. ¹⁹ Də ku nətɔ tə mama, ku tə Yu mù nə tún, ku ba lwàní. Ku yi ndə ba nə tún diè dəkuu nə, ba púpúní sùràn tə tə ka dəkuu tə yuu wa. Tə sùràn tə swìn, tə wú: «*Yuu-Tiu yèé là tə, ba nə yi ɔ mù nə tɪ». Púpúná tə duən də swìn, tə wú: «Liù tə mama, ɔ nə bɪri də, ɔ ya *Yuu-Tiu nə tɪ, ku tíú dān mɛ, sə ɔ yá kɔnkɔn yìèn fàŋú nə».

²⁰ N nə zva jɪjə tíú diè wa, n wá na zɪla yirə yirə tə nə wulə lá. Zɪla təntə duən yi síán wùrú zɔŋi, nə à yèé lugu wùrú zɔŋi. Tə duən də yi d̀̀̀ ba nə sárí, nə à yèé tɪran nə ba ma fwa tə. Tə mù zɪla təntə mama tɔtɔnan tà nədɔ. Zɪla tə nə zìən nə, ba ma tɔŋa càná dɪn nə. Tə duən tə mù ya, ba ma tɔŋa dɪn mama. ²¹ Mə nə yi nətɔ. Də liù nə cìgà ɔ tìàn nə də yolwan tə mama, à nə swìn tə yoo, ɔ yi ndə wùrú zɔŋa tə nə, ba nə ma tɔŋa càná dɪn nə. Yuu-Tiu wá lɪ wá ɔ tún vān nə, sə ɔ ya ɔ mù nyiən. Ʋ tɔtɔŋi zìən ku pa Yuu-Tiu nə, ɔ ga sèe, ɔ tɔŋa tɔtɔnzəŋu yiri mama. ²² Cɪ n tìàn nə dān ká twá fwa yokɔkwɪnan tə,

læzwændun tə nə swə, tə fəŋú. Kə n diàn lá, n pìà ku tə, ku nə yí cígá yoo, də n waa mama. Kə n waa mama Zwezi nə wuuu, sə n sóní là. Pa n mù də là tə, ba nə jùnì nə Yuu-Tiu də bican nəpon tə, ya duən nə də bican sié. ²³ Là nə wulə ba di løyəri tútòná, tə nə yí tutu, dàn ká kə n nii lá. N yèé də, tə mù nə pín, là tə fwa jara də duən. ²⁴ Ku wà me, sə Yuu-Tiu tútònù di jara. U me, sə v zílí là tə mama, sə v ya liù tə, v nə wàá v kàrì, sə v ga ja pínú də ba. ²⁵ U me, sə v ja bɪcabwanu, v ma bɪrɪ là tə, ba nə zɪga v nə. Ku wàá ku pín, Yú twá ku nə, v pín ba vəvəri ba kwa, ba ma sé ba cuna. Yá ba ga lwarɪ cígá sugv tə. ²⁶ Ku wàá ku pín ba pubuŋa píi, ka twi cígá sugv tə nə, ba ga jon ba tiàn *Sitana jìàn wa, v yà nə jìn ba ndə nyali, nə jìn won nətu, v pa, ba tuŋa ku tə, v nə swə.

3

Luu zaŋv máŋá yoo

(2 Piyerə 2.1-22; Zwidə 3; Titə 1.10-16)

¹ Líi n tiàn də yoo, ku tə zəni. Ku mù nə yí, luu zaŋv máŋá tə nə wá yà càn zənzən tə. ² Là tə wá sóní ba tiàn cɪcɪ. Ba wá sóní səbiu, ba ga wá yà là tə, ba nə swə yɪrɪ. Ba wá yà fwiə là, ba ga wá twɪn Yú. Ba wá vɪ ba nyɪna-ba nii, ba ga wá yà yèrì jwɪan là. Ba wá yà là tə, ba nə ba Yú yìèn tə zílí. ³ Ba wá yà là tə, ba yoo nə dà zənzən, ba ga ba læzoni yinəgə dəri. Ba wá yà là tə, ba nə dɔ tɪjaŋa là dèñ nə, ba ga wá sóní jara. Ba wá yà là tə, ba nə yí ndə ganaŋa nə, ba ga bá sóní won tə, ku nə zìən. ⁴ Ba wá yà

lìa tɛ, ba nə ɣɪgarɪ lìa ba dɔga, ba ga wá yà lìa tɛ, ba nə súé də lɪŋa. Ba wá yà fwíə lìa zɛnzɛn, ba ga wá sóní ba fɪra yìèn, ba doni Yɪ. ⁵ Ba wá fwa ndə Yɪ lìa nə. Yá ba ga ba sɛe, sə Yɪ diàn tɛ lwàń ba, sə ba ya ɔ mù Yɪ lìa cígá cígá. N mù Timote, pa n mù də ba lìa tɛntɛ, ya yɪŋɔnɪ də duən.

⁶ Ba mù lìa tɛntɛ yiri nə sègè ba zwɪ lìa dii wa, ba ɣɪgarɪ kana tɛ, ba nə ba diàn jə Zwezi-Kərisə cwəŋə tɛ wa, ba pɪn ba sɛe ba sùràn. Kana tɛntɛ yuu cuna dáá zɛnzɛn ba yuu wa, ba ga yɪ ba twá kɔ tɛ mama nə, kɔ nə ywán kɔ pa ba. ⁷ Ba yɪ kana tɛ, ba nə yáá swə, sə ba nì yoo mama. Yá ba ga wàrì cígá yoo mù, ba lwarɪ míámíán. ⁸ Nətu tɛ, Zwanɛsə* də Zwanbərəsə nə zɪɣɪ *Moyizə nə, mə nətu bara tɛntɛ də zɪga cígá sugɔ tɛ nə. Ba yɪ lìa tɛ, ba pubɔŋa nə ba tɪŋa, ba ga wà ba waa ken Zwezi nə cígá cígá. ⁹ Lìa tɛ mama wá lwarɪ də, ba ya ləyərən, ndə lìa nə lwarɪ də, Zwanɛsə də Zwanbərəsə yɪ ləyərən nətu. Kɔ mù nə pɪn, ba bá wàní ba va yáá.

*Talíkwa kwìè tɛ, Timote nə mɛ, sə n twá tɛ nə
(2 Korɛntə tián 6.3-10; 1 Piyerə 1.19-21)*

¹⁰ N mù Timote, n mù twá à mù Polə nə yìèn tɛ tɛ wa: N yèé nətu, à nə kàrì. N yèé kɔ tɛ, à nə yɪ. N yèé, à nə buŋa, sə à fwa nətu. N yèé, à nə keni à waa Zwezi nə nətu. N yèé, à pínú nə mɛ nətu. N yèé, à nə swə lìa nətu. N yèé, à nə jɪn pínú wuuu, à dàn ká pìí à kə à kwa

* **3:8** 3.8 Zwanɛsə də Zwanbərəsə yà yɪ *Zwifə-ba yɪra, ba nə ma boŋə *Ezwipətə tián jinəmori-ba.

nøtv, à ma twá Yui nè. ¹¹ N ni cànn tē, à nè dí dē wōwalv tē, kv nè yí nè. N yèé yìèn tē mama, tē nè yí nè Pisidi Antuswē nè, Yikoniomē nè, Lisētērē nè. Yá *Yuu-Tiu tē jon nè tē mama wa. ¹² Lìà tē mama, ba nè pìà, ba tì Zwezi-Kørisē cwəŋə tē cígá cígá, ndə Yui nè pìà nøtv, ba wá dé cànn lià duən jìàn wa. ¹³ Yá lià tē mù, ba nè yì wōlvnyina, ba nè gıgarı lià ba dıga, ba mù wá kwen ba cùgà, ba sùrí wuuu. Ba wá gıgarı lià duən ba dıgv, ba ga wá gıgarı ba dē ba dıgv.

¹⁴ N mù Timote, vwa n tìàn kankan yìèn tē nè, ba nè ma kwè mú, n ga pa cígá mama tē nè. N yèé liù tē dē, v nè bırı mú tē yìèn tēntē. ¹⁵ Vwa n tìàn kankan tē yìèn tē nè. N yəni Yui sagı tē dē, n tē yì bisımaa. Kv mù Yui sagı tēntē wàá mú yənu kv pın. Kv mù yənu tēntē nè wàá mú kv bırı nøtv Yui nè jon mú n cuna wa, n nè kenı n waa Zwezi-Kørisē nè wuuu tē yırı. ¹⁶ Yìèn tē mama, ba nè púpúnı Yui sagı tē wa, kv ya Yui-*Siŋu tē nè pın, ba púpúnı tē. Tē zıen, sē ba ja tē ba kàrì lià. Tē mù nè wàá lià tē bırı dē, ba ba cígá jə. Tē mù nè yàá caga lià nii nè dē, ba nè fwa yolwan. Tē mù nè bırı, nøtv lià nè mē, sē ba ya cígá wa. ¹⁷ Yui-Siŋu tē fwa kv nøtv tē, sē kv pa Yui liù wàní v mì ka fwa yozəŋə mama.

4

(Tɔtvnan 20.28-31; 2 Timote 2.3-7)

¹ Dınn don nè, Zwezi-*Kørisē wá pıı v bà. U wá bà ndə pıv nè. U wá bürı tıga tē bürà, v ga bürı ba tē, ba nè wà tı, dē bürà. À mù Polə dànn pın

nii ku tə n m̀ Timote nə, Yui yáá con də Zwezi-Kərisə yáá con. ² Swìn suywánú tə, n biri! Swìn ku də n bwé! Máná tə nə ziən, sə n swìn ku. Ka nə kúò ba ziən də, sə n tə swìn ku. Biri là tə, ba nə tɔŋa lwanı tə, də ba ba cígá jə, n ga caga ba nii nə. Kwè ba, sə ba fwa ku tə, ku nə ziən. Ja pínú dıun mama, n ma kàrì ba nətı. ³ Máná don wá bà, là tə nə kúò bá cugı ba tə, ba nə kàrì cígá s̀ràn tə ba biri, ba nə pìà, sə ba tɔn yokukwınan tə yiri. Ba wá p̀e karnyına duən, ba ma kıkarı ba tìàn, sə ba kàrì ba yìèn tə, ba nə swə. ⁴ Ba kúò bá cugı cígá s̀ràn tə, ba dãn wá p̀ı, ba cuga kunkun yomanan. ⁵ N m̀ Timote, n mɛ, sə n ya liù tə, n nə yèé yoo dèh, máná mama, wuuu. Sèe, sə n dé càn tə, sə n swìn suywánú tə n biri là nə. Tɔn tutɔŋı tə, Yui nə pın mú, n pa ku nii sú.

(Filipə tián 1.20-23; 1 Timote 1.19-20; Matie 10.18-20)

⁶ À m̀ Polə yi ndə vanı nə, ba nə tanı, sə ba ma fwa *jonı. Ku pìà ku biri də, à máná yı, sə à va Yui con. ⁷ À ta Zwezi-Kərisə yiri zənzən. À zwèe ku tə, Yui nə pın nə, sə à fwa, ndə liù nə dəri ı va ı yı bwálı tə, ı nə mɛ, sə ı yı lá. À ken à waa Zwezi nə wuuu, à wà p̀ı à kə à kwa. ⁸ Síún nə, à yèé də, Yui tún à ŋwírán ı con, tə nə dãnı nə. Nə Yuu-Tiu nə wá b̀rì nə b̀rà dıun don nə. Ku dıun tə nə, ı wá pa nə cígá tíú yupuu tə. Ku tà à cıci nə, ı wá pa ku, ı wá pa ku là tə mama nə, ba nə swə, sə ı p̀ı ı bà.

Polə boŋə Timote, sə ı bà ı con

⁹ Timote, kə diàn, n bà n yí nə lala! ¹⁰ Demasə viga nə v dɔgv, síún lɔv kɔ tɔ wiən fira nə jə wá yiri. Yá v dàń vəli Tesalonikə. Kəresansə də vəli Galasi, Titə də ga va Daləmasi. ¹¹ Likə cici nə wulə à con. Máná tɔ wa, n nə biàn, sə n ja Marəkə, n ja kə lá n bà. U wàá à nə v saɲa. ¹² Tiswikə mù ya à mù nə tun wá Efəzə nə. ¹³ Máná tɔ, n nə biàn, sə n twá Karəpise con Tərowasə nə, n jon à gànù, à víí à yá lá, n ja bà n pa nə. N nə biàn, sə n kə lá n ja saga tɔ n bà. Kɔ tɔ, kɔ nə dwə à yà swə, sə n ja tɔ tɔ, ba nə púpúní tanan tɔ wa, n ja bà.

¹⁴ Alekəzandərə, v nə yi yarv, tun yolwan nəfarv à yira. Nə *Yuu-Tiu nə wá ŋwín kɔ tɔ, v nə tun, tɔ ŋwírán v pa wá. ¹⁵ Ci n tiàn nə də wá, v cigà nə kàrà tɔ yáá nə də diàn.

¹⁶ À nə təntən à tún à nii là tɔ, ba nə buri buri, tɔ yáá con, liù mama wà v nii ken à kwa. Ba mama viga nə ba dɔgv. Yu nə wá kwen ba cuna, v li ba mù də wá pwərə wa. ¹⁷ Də kɔ nətu me Yuu-Tiu tɔ wà nə vi v dɔgv. U mù nə pin nə diàn, à ma wàní à swìn v sɔgv tɔ mama, à biri ndə kɔ nə me nətu. Là tɔ mama, ba nə tà *Zwifə-ba, ni kɔ. Yuu-Tiu nə san nə, à ma wàní à jon à tiàn tian jun wa. ¹⁸ Yuu-Tiu nə wá ci à nə də yolwan mama, v ga wá jon nə, v pa à zv v nyina Yu *sàń tɔ wa. U mù nə me də dun dun mama wuuu. Amuna!

Sagi tɔ yígúré jònà

¹⁹ Jun Pərisəka də Akilasə n pa nə. Jun Oneziforə də v diè là tɔ n pa nə. ²⁰ Erasətə wulə Korəntə nə. Tərofimə mù yira ba zurə, à ma yá

wá Mile nə. ²¹ Kə dɪ̀àn, sə n bà də waran tə máná tə wà yí. Əbilisə də Pidansə də Linisə də Kəlodɪa də lɪ̀à tə duən tə mama, ba nə yɪ n nubɪa *Kərisə yɪrɪ tə, jùnà mú. ²² *Yuu-Tiu nə wá yà də mú. U wá fwa ɔ pubwanɔ tə á yɪra. Amɪna!

Yu soywánó sagı
Nuni, Southern: Yu soywánó sagı New Testament
Le Nouveau Testament en Nun

copyright © 1999 Wycliffe Bible Translators, Inc.

Language: Nuni, Southern

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 21 Feb 2024 from source
files dated 29 Jan 2022

d18530a7-7259-5f23-92b6-70e3abe5f3fa